

### मंत्रिपरिषद—निर्णय

राज्य प्रसासनिक सुधार आयोग के कार्यकाल ल इकतीस दिसंबर दू हजार अट्ठारह तक बढ़ा दे गेहे। मुख्यमंत्री डॉक्टर रमन सिंह के पगरइति म आज मंत्रालय म होय मंत्रिपरिषद के बइठका म ए फइसला ले गीस। आयोग के कार्यकाल ह ए बछर इकतीस दिसंबर के सिरावत हे।

एखर संगेसंग मंत्रिपरिषद ह तृतीय अनुपूरक अनुमान बछर दू हजार सत्रह—अट्ठारह विधानसभा म उप—स्थापन अउ छत्तीसगढ़ विनियोग विधेयक के अनुमोदन घलो कर देहे।

### एम.के. राउत—शपथ

भारतीय प्रसासनिक सेवा के अधिकारी एम.के. राउत ह आज राज्य के मुख्य सूचना आयुक्त पद के सपथ लीन। राज्यपाल बलरामजी दास टंडन ह राजभवन म राखे गे एक टिन कारीकरम म ओमन ल पद अउ गोपनीयता के सपथ देवाईन। ए मउका म मुख्यमंत्री डॉक्टर रमन सिंह, विधानसभा अध्यक्ष गौरीशंकर अग्रवाल, मंत्रिमंडल के सदस्य समेत बड़का अधिकारी मौजूद रिहीन। खबर के मुताबिक श्री राउत उन्नीस सौ चौरासी बैच के आईएएस हरय।

### खेल नीति—परिचर्चा

खेल विभाग ह अब पंडित रविशंकर शुक्ल विश्वविद्यालय के सारिरिक शिक्षा विभाग के संग मिलके एन. आई.एस. डिप्लोमा अउ सर्टिफिकेट कोर्स सुरू करे उपर बिचार करत हे। काली रईपुर म राखे गे एक टिन परिचर्चा म खेल विभाग के विशेष सचिव आर. प्रसन्ना ह ए जानकारी दीन। परिचर्चा म छत्तीसगढ़ खेल नीति के क्रियान्वयन के संबंध म बिचार—विमर्स करे गीस।

एखर संगेसंग खेल विशेषज्ञ डहार ले ग्रामीण अंचल ले खिलाड़ी मन ल चुनके ओमन ल बिसेस परसिक्षण देके सुधर खिलाड़ी के रूप म तियार करे के संबंध म गोठबात करे गीस। खेल मन ल नीचे स्तर ले बढ़ाय बर जिला अउ विकासखंड स्तर म खेल संघ के गठन के सुझाव खेल संघ मन ल दे गेहे।

### सुप्रीम कोर्ट—विशेष न्यायालय

केन्द्र सरकार ह उच्चतम न्यायालय ल बताय हे कि राजनेता मन ले जुड़े मामला के फइसला बर बारह टिन बिसेस न्यायालय बनाय जाही। सर्वोच्च न्यायालय ह केन्द्र सरकार ले डेढ़ हजार ले जादा सांसद अउ विधायक मन ले जुड़े मामला के निपटारा बर बिसेस न्यायालय बनाय के योजना पेस करे बर केहे रिहीस।

विधि अउ न्याय मंत्रालय ह किहीन हे कि आठ करोड़ रूपिया के लागत ले एक बछर बर बारह टिन बिसेस अदालत गठित करे जाही।

### माओवादी—गिरफ्तार

कोडागांव जिला म पुलिस ह आज दू झिन माओवादी मन ल गिरफ्तार करे हे। मिले खबर के मुताबिक जिला के मर्दापाल थाना क्षेत्र ले पुलिस बल सर्चिंग बर निकले रिहीस। इही दउरान हड़ेली कैम्प के तीर ले ए माओवादी मन ल पकड़े गीस। ए दूनो माओवादी जनमिलिसिया के सदस्य हरय। इंखर मन उपर पुलिस पार्टी उपर फायरिंग करे समेत अउ आने—आने वारदात म सामिल होय के आरोप हावय।

### राजनांदगांव—किसान प्रदर्शन

राजनांदगांव म आज किसान मन ह करजा माफी समेत अपन आने—आने मांग ल लेके रैली निकालीन अउ धरना—प्रदर्शन करीन। ए किसान मन ह रैली के सक्ल म सहर कोति निकलीन, त पुलिस अउ प्रसासन ह ओमन ल पहिलीच ले रोक दीन। ए दउरान पुलिस ह करीबन तीन सौ किसान मन ल गिरफ्तार घलो कर लेहे।

### सीडी कांड—विनोद वर्मा

सीबीआई ह कथित अश्लील सीडी कांड के जांच चालू कर देहे। सीबीआई ह ए संबंध म काली दू टिन एफआईआर दरज करे हे। पहिली एफआईआर प्रकाश बजाज के सिकईत म करे हे। उहें, दूसर

एफआईआर राजेश मूणत के सिकईत उपर दरज करे गेहे। सीबीआई ह ए मामला के जांच अधिकारी डीएसपी रीछपाल सिंह ल बनाय हे।

सीबीआई ह आईटी एक्ट के तहत मूणत के सिकईत म कांग्रेस के प्रदेश अध्यक्ष भूपेश बघेल अउ बड़का पत्रकार विनोद वर्मा के खिलाफ मामला दरज करे हे। एखर पहिली, रईपुर के सिविल लाइन थाना म मंत्री राजेश मूणत ह पाछु सत्ताईस अक्टूबर के अपन फरजी सेक्स सीडी प्रसारित करे के आरोप म दरज कराय रिहीस। उहें, दूसर केस भाजपा नेता प्रकाश बजाज के सिकईत म दरज करे गेहे। एमा कोनों ल आरोपी नइ बनाय हे।

खबर के मुताबिक ए मामला के आरोपी पत्रकार विनोद वर्मा ए बेरा रईपुर म केन्द्रीय जेल म न्यायिक हिरासत म हावय।

### धान-खरीदी

प्रदेश म ए दिन समर्थन मूल्य म धान खरीदी करे जावत हे। सहकारी समिति के उपार्जन केन्द्र मन म अब तक साढ़े सत्रह लाख ले जादा मीट्रिक टन धान के खरीदी करे जा चुके हे। धान खरीदी पाछु पन्द्रह नवम्बर ले सुरु होय हे, जउन ह अवइया बछर इकतीस जनवरी तक चलही।

### हाफ-मैराथन

नवा रईपुर म अवइया अट्ठाईस जनवरी के हाफ मैराथन के आयोजन करे जाही। ए मैराथन म पद्मश्री पी.टी. उषा अउ भारतीय एथलेटिक टीम के के कोच जी.एस. भाटिया घलो मौजूद रइही। खेल विभाग डहार ले राखे गे ए मैराथन म सामिल होय बर ऑनलाईन पंजीयन सुरु होगे हे। मैराथन म भाग ले बर धावक, खेल विभाग के वेबसाइट अउ मोबाइल ऐप के माध्यम ले अपन पंजीयन करा सकत हे।

खेल विभाग के अधिकारी मन ह बतईन कि ए मैराथन म राष्ट्रीय अउ अंतर्राष्ट्रीय स्तर के धावक मनके संग राज्य के युवा सहित करीबन तीस हजार धावक भाग लीहीं। हाफ मैराथन के आयोजन नवा रईपुर के शहीद वीरनारायण सिंह अंतर्राष्ट्रीय क्रिकेट स्टेडियम के तीर होही। मैराथन म आने-आने वर्ग म जीतइया प्रतिभागी मन ल करीबन बत्तीस लाख छियासठ हजार रुपिया के इनाम दे जाही।